

## DOMENIE II DI CORESIME

### Antifone di jentrade cf. Sal 26,8-9

**I**l gno cûr a ti ti fevele,  
ti cûr la mê muse.  
La tô muse, Signôr, o voi cirintle.  
No sta platâmi alore la tô muse.

No si dîs Glorie a Diu.

### Colete

Diu, che tu nus âs ordenât di scoltâ to Fi tant benvolût,  
indegniti di passi il nestri cûr cu la tô peraule di mût che,  
purificât il voli da l'anime,  
o podìn consolâsi tal contemplâ la tô glorie.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Gjen 15,5-12.17-18

Diu al fasè un pat cun Abram, om fedêl.

Dal libri de Gjenesi

In chei dîs, Diu al menà fûr Abram e i disè: «Cjale sù tal cîl e conte lis stelis, se tu rivis a contâlis»,  
e i disè: «Cussì e sarà la tô gjernazie». Abram i à crodût al Signôr e chest i è stât metût in cont di  
justizie. Dissal: «Jo o soi il Signôr, che ti à tirât fûr di Ur dai Caldeus par fâti diventâ paron esotic  
di cheste tiere». Al rispuindè Abram: «Signôr gno Diu, cemût fasio a savê che dut al sarà gno?».  
Dissal: «Va a cjolimi une manze di trê agns, une cjavre di trê agns, un roc di trê agns, une tortorele  
e un colombin». I puartà dongje ducj chescj nemâi, ju taia pal mieç e al metè un toc in face di chel  
altri, ma nol smiezà i ucei. I ucelats a plombarin su la cjarnasse, ma Abram ju sovà vie. Cuan che il  
soreli al leve a mont, a Abram i vignì une grande flaperie e un grant scûr lu gafà.  
Lât a mont il soreli e vignût scûr, ve che une fornâs impiade e un lampion di fûc a passarin framieç  
di chei tocs smiezâts. In chê dì il Signôr al fasè cun Abram chest pat:  
«Jo o doi a la tô gjernazie cheste tiere,  
dal flum dal Egjit  
fin al grant flum, il flum Eufrât».  
Peraule di Diu.

### SALM RESPONSORIÂL dal Salm 26

**R.** Il Signôr al è la mê lûs e la mê salvece.

Il Signôr al è chel che al pare la mê vite,  
di cui varaio pôre?  
Se un esercit intîr cuintri di me si campe,  
il gno cûr nol à pôre. **R.**

Scolte, Signôr, la vôs dal gno berli,  
vê dûl di me e rispuindimi.  
Il gno cûr a ti ti fevele,  
ti cûr te la mê muse;  
la tô muse, Signôr, o voi cirintle.  
No sta platâmi alore la tô muse. **R.**

No sta parâ vie disdegnât il to famei,

tu che tu mi paris. No sta parâmi vie,  
no sta bandonâmi, Diu de mê salvece. **R.**

Ce saressial stât di me se no fos stât sigûr  
di gjoldi de bontât dal Signôr te tiere dai vîfs?  
Spere tal Signôr! Dati coragjo,  
che al cjapi fuarce il to cûr, e spere tal Signôr. **R.**

### **SECONDE LETURE Fil 3,17-4,1**

**Crist nus trasformarà tal so cuarp gloriôs.**

De letare di san Pauli apuestul ai Filipês

Fasêt come che o fâs jo, fradis, e pontait la vuestre atenzion sun chei che si compuartin seont il model che o vês in nô. Parcè che une vore di lôr, che us ài za vût fevelât e cumò us torni a fevelâ cu lis lagrimis tai vôi, si compuartin di nemîs de crôs di Crist; la lôr fin e je la ruvine, il lôr diu e je la panze, la lôr braure e je la vergogne; chei li a àn tal cjâf dome lis robis di chest mont. Nô però o sin citadins dal cîl e di là sù o spietin come salvadôr il Signôr Jesù Crist, che al trasformarà il nestri puar cuarp par fâlu diventâ sul stamp dal so cuarp gloriôs, in virtût dal podê che al à di meti sot di sè il mont intîr.

Par chel, fradis miei tant cjârs e tant suspirâts, che o sês la mê gjonde e la mê zoe, restait salts cussì tal Signôr, miei cjârs.

Peraule di Diu.

### **CJANT AL VANZELI cf. Mc 9,7**

**R.** Laut e onôr a ti, Signôr Jesù!

Dal nûl sflandorôs si sinti la vôs dal Pari:

«Chel chi al è gno Fi il plui cjâr: scoltaitlu!»

**R.** Laut e onôr a ti, Signôr Jesù!

### **VANZELI Lc 9,28-36**

**Biel che Jesù al jere daûr a preâ, la sô muse e cambiâ filusumie.**

Dal vanzeli seont Luche

In chê volte, Jesù al cjolè cun sè Pieri, Zuan e Jacum e al lè su la mont a preâ. Biel che al jere daûr a preâ, la sô muse e cambiâ filusumie e la sô vieste e diventâ cjandide e sflandorose. E ve che doi oms a vignirin a fevelâ cun lui: a jerin Mosè e Elie, comparîts te lôr glorie, e a fevelavin de sô partence che e stave par colmâsi a Jerusalem. Pieri e i siei compagns a jerin cjamâts di sium, ma a restarin sveâts e a vioderin la glorie e i doi oms che a jerin cun lui. Intant che chei si separavin di lui, Pieri i disè a Jesù: «Mestri, ce ben che o stin chi. O fasarin trê tendis, une par te, une par Mosè e une par Elie». Ma nol saveve ce che al diseve. E intant che al diseve chestis robis, al rivà un nûl e ju taponà. A cjaparin pôre cuant che a jentrarin tal nûl. Alore dal nûl e saltà fûr une vôs che e diseve: «Chel chi al è gno Fi, l'elet, scoltaitlu!». A pene che la vôs e cessà, Jesù al restà di bessôl. Lôr a taserin e in chei dîs no i contarin nuie a di nissun di ce che a vevin viodût.

Peraule dal Signôr.

**Si dîs** O crôt.

### **Su lis ufiertis**

Ti preìn, Signôr, che cheste ufierte nus smondei dai nestris pecjâts

e e santifichi il cuarp e l'anime dai tiei fedêi

par preparâju a celebrâ lis fiestis di Pasche.

Par Crist nestri Signôr.

### **Antifone a la comunion Mt 17,5**

Chel chi al è gno Fi il preferît,

là che jo o ài metude dute la mê contentece.  
Scoltaitlu.

### Daspò de comunion

Ti vin agrât, Signôr,  
di vênus fats partecipâ ai misteris de tô glorie,  
che nus permetin di gjoldi des robis dal cîl  
biel che o sin ancjemò su la tiere.  
Par Crist nestri Signôr.

### Preiere sul popul

Benedis cuntune benedizion eterne i tiei fedêi, Signôr,  
e fâs che a sedin tant tacâts al Vanzeli dal to Unigjenit  
di bramâ cence padin e di vê la furtune  
di rivâ a chê glorie che lui si è palesât ai Apuestui.  
Par Crist nestri Signôr.